



Komunikadu Imprensa
06 Marsu 2020

“Selebrasaun Loron Feto Internasionál” JSMP husu parte hotu kontribui ba halakon violénsia hasoru feto

Iha 08 Marsu, tinan–tinan komemora nu’udar loron Internasionál ba Feto no tema globál ba selebrasaun tinan ida ne’e mak “Hau mak Jerasaun Igualdade: Realiza Direitu Feto nian” (*I am Generation Equality: Realizing Women’s Rights*).

Tema ne’e importante atu fó hanoin filafali ukun-nain sira nia kumprimísio no komitmentu ba promove no proteje feto no labarik feto sira nia direitu husi kualkér violénsia, no oinsa bele ajuda sosiedade hotu atu hakribi hahalok violénsia no la halo diskriminasaun sira ho forma oin-oin hasoru feto no labarik feto. Tanba hahalok sira ne’e konsidera kontra umanidade ka hahalok krime ne’ebé temi ona iha Lei Nasionál no Konvensaun Internasionál sira.

Komemorasaun loron feto Internasionál ne’e nu’udar momentum importante ida ne’ebé atu valoriza feto sira nia direitu no kontinua relembra movimentu, esforsu no komitmentu global atu rekoñese feto nia luta no enkoraza partisipasaun ema hotu hodi promove igualdade entre feto no mane. Esforsu hirak ne’e ikus mai hetan ona progresu signifkativa, mezmú sei iha nafatin servisu barak atu halo.

Komemorasaun ne’e ho objetivu atu atinje igualdade jéneru no hakotu diskriminasaun no violénsia hasoru feto nomós asegura oportunidade no partisipasaun hanesan iha aspeitu hotu-hotu ba iha dezenvolvimentu nasaun nian.

“Estadu Timor-Leste liuhosi instituisaun relevante sira halo ona esforsu oin-oin, atu dezenvolve feto no enkoraza partisipasaun feto iha aspeitu hotu-hotu. Mezmú nune’e, feto no labarik feto barak mak sei kontinua luta atu hakotu korente violénsia, tantu violénsia ne’ebé akontese iha uma laran, violénsia seksuál no abuzu seksuál hasoru feto no labarik sira, no diskriminasaun ho forma oin-oin ne’ebé sira hasoru,” dehan Casimiro dos Santos, Diretór Interinu Ezekutivu JSMP.

JSMP ninia estatística monitorizasaun iha tribunál sira rejista forma violénsia oin-oin hasoru feto no labarik feto sira. Tendénsia violénsia hirak-ne’e ne’ebé sempre akontese mak violénsia doméstika, violasaun seksuál no abuzu seksuál hasoru labarik feto, abandonu inklui krime ho natureza inestu no krime hirak ne’e potencialmente sei prejudika tebes feto sira nia vida normál

hanesan ema no impede sira nia oportunidade atu goja sira nia direitu hanesan ema iha nasaun demokrátiku ida hanesan Timor-Leste.

Iha 2019, JSMP monitoriza no analiza kazu hamutuk 414 ne'ebé envolve violénsia bazeia ba jéneru no kazu 396 hasoru vítima feto no labarik feto no kazu 14 envolve vítima mane no labarik mane. Hosi estatística ne'ebé iha hatudu katak feto no labarik feto continua sai vítima iha kazu krime violénsia doméstika no violénsia seksuál. Situasaun ne'e hatudu katak estadu no instituisaun relevante sira falla atu proteje feto no labarik feto sira husi kualkér forma violénsia no diskriminasaun oin-oin, nune'e feto no labarik feto la sente seguru iha sira nia uma laran rasik.

JSMP apresia esforsu hotu-hotu ne'ebé estadu halo liu-hosi política oin-oin atu promove igualdade jéneru no política lejislativu atu proteje feto no labarik feto hosi violénsia. Maski nune'e JSMP nafatin enkoraza entidade hotu kontribui hodi dezenvolve promove política toléransia zero violénsia hasoru feto no labarik iha sosiédade. JSMP espera katak komemorasaun Loron Feto Internasional ne'e la'ós aktu serimoniál de'it, maibé nu'udar komitmentu koletivu no institusionál ida atu luta hodi hakotu violénsia hasoru feto no labarik feto sira iha Timor-Leste.

Relasiona ho komemorasaun lora importante ne'e, JSMP aproveita hodi kongratula feto hotu iha mundu, liu-liu feto no entidade sira iha Timor-Leste ne'ebé iha korazen atu continua luta hodi defende feto sira-nia direitu no luta ba lia-loos no justisa.

Casimiro dos Santos

Diretór Interinu JSMP

Diresaun e-mail: santos.cas76@gmail.com | casimiro@jsmp.tl

info@jsmp.tl

Website: <http://jsmp.tl/>

| Telefone: [3323883](tel:3323883) | [77257466](tel:77257466)